

味檠齋文集
二二





味 壁 齋 文 集

(二十)

趙 南 星 著

味槃齋文集卷十四

行狀

明兩浙鹽運司轉運使劉公行狀

劉公諱自化。字伯時。別號少嵐。先世河南衛輝人。國初有仕於高陵者。因家焉。高祖清。曾祖繼本。祖贈長史公。彥成。父爲長史公。遷母宜人李氏。以嘉靖丁酉四月三十日生公。左史公教授南陽時。公從。年八歲。受學王先生。穎悟過人。十歲時。李宜人歸甯。借郵符以行。抵潼津而格。公乃謁見觀察使者。風神秀朗。進退應對如老成人。使者器之。命乘傳出疆。公受經趙先生。爲文日進。年十八如京師。少司徒確山劉公大實爲選郎。曾宰高陵。與左史公相善。劉公有子三人。命與公面試。許季子與公皆當甲科。後竟如其言。乙卯。左史公陞崇府。居汝南。汝南故多才。公與其名士爲文會。皆服之。辛酉歸試。督學取入學。復還汝上。甲子。督學爲大司空。內江陰公武卿取第一。遂得舉。明年登會榜。射策二甲。是歲八月。授戶部廣東司主事。十月。管崇文稅課。算商車。令各以其物自占。而緡錢多從寬貸。無何陞員外。管明智草場。商人以千金爲壽。其來舊矣。公笑而卻之。不以語人也。及到。芻僧一無繳繞。商乃悅服。管太倉銀庫。前此有竊金者。主名

不立。至是得之。乃立交盤之法。銀庫交盤自公始。同事者不悅。竟左轉四川重慶倅。太宰蒲州楊公博曰。此事與公無與。施復復故。毋之官。甫數月。陞南戶部主事。尋陞刑部廣東司員外郎。江西司郎中。調戶部廣東司會。漕糧阻滯。大司徒張公上疏。言漕糧三月過淮。七月上倉。今已過期。尙在淮南。宜擇有風力者往。乃以公請。既拜命。卽繇通州直抵淮北。沿漕渠督察。漕船無故而道留。皆以軍興法。彭考武官。漕卒或停泊河壩。聞公來。無不越幫競進。時河決黃鍾。溢溢浸灌。夜半入徐城。以大舟乘土。力爲壅塞。而水始退。漕糧數十萬。皆得輸太倉。是時有分黃之議。公曰。不然。聞之人言。吾甚信之。黃河之勢無兩大。黃而可分。禹之九河。至今存可也。人以爲確論。左史公以十九年俸加三品。王請許奏司。公謁見太宰楊公。楊公曰。有強晟例在。公曰。奏中所引正以此。然而不可考矣。椽屬以爲難。楊公曰。余所記不誤也。竟如所奏。公資俸已深。湖廣巡撫寓書吏部。欲得公共事。陞湖廣岳州府知府。至郡。誓城隍曰。惟我與神共主此土。倘不潔己愛民。真心任事。上負朝廷。下負蒼赤。以爲二親憂。惟神實式臨之。公先平旦至後堂。辦條職。日不暇給。開閣聽政。人詣府口言事。皆爲之辭答。無不各如其意所在。諸逮證必質確其事。分解趣理。而中折之。鞠斷如流水。皆曰。我等裹糧而來。至則行矣。何用謁舍哉。吏人同聲謂之不煩。錄囚多從平反。撮其切要數語。而坐狀了然。直指李公見而稱之。臨湘無城。請城之。不勞民力而功就。平江有萑苻之警。游繳遮泄而捕不得。公躬履其境。擒其渠率。餘皆解散。衛士兌糧。舊設辰陵磯。離郡十里。後改之武昌。不便。公力爲

百姓請命而上司議格越十餘年。少司馬崔公景榮以直指行部。乃上奏請復辰陵磯故事。曰：此先守臣劉某所條議而未行者也。至今軍民賴之。公真心任事。人不盡知。皆此類也。典選胡公謂才任理劇。擬拜大郡。會歲盡。上計吏僉以巴陵令罪狀皆應記。於是直指向公暴章彈之。而令妄意江陵公子。秋場缺望。乃論直指劾奏不公。波及道府。公竟坐調。公守岳三年。行之日。俸金三兩而已。省覲汝上。李宜人曰：行囊如此。何以入長安。左史公笑曰：爲廉吏而飽載乎。乃出俸錢佐之。自長安還。復居汝上者一年。始謁選人。補任登州。既至郡。誓城隍而後視事。一皆如岳。公因笑曰：岳之屬八。登亦八。岳濱湖。登濱海。岳有君山。登可數觀海市。見日出。是亦壯遊。因自號曰湖海主人。問遺長安。則珠璣子蠶磯硯海市圖而已。相知者答云：此後無勞再寄。恐煩行李也。公微笑之。登郡科第頗少。公興起學官。市民居闕雲路。建文峯於山左。乃都授諸生。而擇其開敏者立會所。躬自品題。宋君兆祥。左君之有。趙君思敏。劉君兆文。徐君逢聘。徐君援。陸君埜。皆登第。至今甲第接踵。文登無城。請城之。不勞民力而功就。如臨湘。填撫內江河。公薦第一。登青萊三郡。各出名糧。而程督於登。負算至二萬。公曰：杼柚空矣。民旣逋畝。而又應糧鄰郡。雖鞭之長。不及馬腹。吾安能以夜名驚吠犬乎。於是大司馬平議曰：撫字心勞。催科政拙。其奪二千石俸兩月。而盡蠲名糧。公曰：以吾二月之俸。而省民二萬之金。吾之志也。三郡人聞之。皆曰：小民屈竭。省鞭扑且千萬。陰德如此。子公駟馬高蓋車。其在子孫乎。時陽城王公任太宰。王曾爲大司徒。屬意某商。以公無所下借。銜之。至是。

陞山東運長。至則夙弊一清。商人戴之。或問直指徽州黃公云。劉公何如人。答曰。清操質行。己卯壬午兩分較。得士十人。而給舍楊君其休。督學杜君華先。今延綏填撫董君國光。皆登甲第。而杜以落卷舉首。時貽哲首舉秦中。癸未。李宜人計至。遂奔汝上。獨居聖室。而素食者三年。禮竟。繇汝赴長安。戊子。除兩浙釐革夙弊如東省。有浙人仕於長安者。曰。劉公之清。向所未見也。己丑入計。而左史公計至。奔汝上。輿襯而西。且行且泣。路人爲之隕涕。藩府爲左史公立祠焉。既抵舍。與李宜人合葬。乃趨汝上。展拜左史公祠下。悲泣傷感。依依不能去。已而瞻望承塵。構飾祠具。刻木爲像而事之。上烏紗冠。大紅衣。束帶三采綬。烏紋靴。褹襦中幫。生存之具無不備。而衣以五時易。望之儼然如在。旦起陳嚴具。易禮服。而後詣坐前。手自整拂。然後跪而焚香。尙食稽首。旦夕亦如之。以爲常。出則告入。雖夜漏下。亦必告薦鮮進熟。卽一菓一菜。未獻不敢嘗。有事則跪而陳辭。一字一絨未獻。不敢開。皆手自獻而稽首。王遣官屬登祭。以春秋用戊。羊豚俎實具。公又採詩章。做鹿鳴之聲而歌之。雅吹擊磬。拜獻贊嚮。雍雍如也。祠之傍。蕭然一榻。居息於斯。讌會於斯。久之。左史公祀鄉較。公曰。吾當抱木主而進於廟。遂馳歸。而於北堂中坎立主室。朝夕跪拜。如汝南堂之傍。設一榻。圖書數卷。敝祗裯一囊而已。家徒壁立。夜戶不扃。崇王薨。公曰。吾舊臣之子也。素車白馬而往臨焉。乃投其葬日。星行到朗陵。王將寢。適與時會。人皆奇之。居數月。往還高陵時。直指徽州畢公懋。薦薦地方人才。問於人曰。往者薦舉多貴顯。亦前後相襲耳。吾欲自用一澹退士。風末進。語及公。或曰。

未知也。畢曰：安有壯年懸車二十五年而人不知者？此所謂不求聞達於諸侯者乎？尚不謂之賢耶？乃檄下廉公素履。疏薦云：清修不取一介，明發有懷二人。浩然思蓴菜之秋風久矣。飲木蘭之玉露，人是義皇以上。隱同箕穎之高，可謂知公矣。三原溫公純公同年也。爲御史大夫，富平孫公丕揚爲太宰，歸德沈公初入政府，擬薦天下人才，公與焉。竟不肯出。少司馬靜峯汪公嘗曰：劉公真能遺榮矣。公少時稟賦清瑯，而精神健旺。中年頤養益厚，登華山絕頂，若履平地。少年皆以爲弗如也。有勝槩，無不登臨。人有佳園林，無不到。公七八歲從左史公游，以小石築爲山，插松柏爲樹，有山川烟霞之致。殆其天性云。家居少事，尤好栽植。數十年一第室，不能獮唐園池亭不具。牆垣不治，而惟松柏翳然。涇河之澍，種柳樹千，垂陰四十畝。曰：柳林從涇河放舟而觀之。嘗問貽哲曰：汝知涇渭乎？詩云：涇以渭濁。朱子以涇濁渭清解之。吾以爲不然。涇自桃花水盛則濁，至十月則清於渭矣。是清者其本體耳。涇水之誣，自我而始。白天下甯獨此哉？公貧而好客，客至必張坐具，器食數問家餘幾所亡，則趣典衣，益市豚酒，款洽曠夕。或夜分，給人馬酒，食甚備。每嚮會親，雖貧延致上坐，禮敬與均。市道平人至門上謁，無不省見，容接以禮。或過從它客，談讌終日。通家戚里，賀問之好，無不送敬。或遠或近，無不親到。其人亡，必以絮酒過相沃酹。曰：今游道薄矣，豈以存亡貳心耶？與人交，久而彌篤。解構之言不能入也。雖處人無所嫌，搢而持執堅定，無所回從。詆嫫媒短，絕不出口。而人有過舉，必移書質讓之。人有緩急，亦必就之商，臨可否，乃露其底裏。長無纖介。少室張公

爲密雲令。爲飲章所中。公傾身營救。不遺餘力。曰。張有女。及笄而亡母。乃令墨淑人共女止於中。而公介居舍外。久之。張事解對。與女還汝南。馬梁園督學曰。向固知劉公清正耳。至託妻寄子。古人所難。今乃見之。孝廉秋肖平父子俱歿無嗣。而肖平曾有子產於外。公訪求得之。聚秋氏之族。而謀立以爲後。倬菴石公爲商洛監司。病篤。公往視之。石公以其身託及幼子。乃爲之治喪輓送。往返七百里。嘗曰。少室諸公。分則友而義則師。敢自處以薄乎。公結髮事師。備弟子禮。每念師門淵源。恩深分厚。一飯不敢忘。嘗至南陽。易水。登趙王兩先生堂。留數日。爲之盡歡。座主太僕江西鍾公沂。少司馬青州石公茂華。澤州楊公爾中。蒲州張鳳磐相。公皆事之甚恭。歲時上起居。沒則爲位而哭。或行役過之。必展拜其墓。哭盡哀而去。楊公之子貧。館穀者經年。曰。吾師之子也。每寄相知書。輒滿數紙。或曰。得無多乎。公曰。相知分隔。形於監寐。安能作數語寥寥也。豫章司城熊公嘗曰。時月之間。不見劉公手筆。便如饑渴。有人遠行。必設祖帳。拜而送之。居鄉一無請屬。至地方大事。必潔齋露簪而筮。得吉則慶。凡事關一縣。無不班班索言之。可爲則無不力也。國初高陵置驛馬爲神皋。未幾汰去。而以站金佐他縣之急。乃冠蓋之使。避會省。走高陵。車馬往來。輻輳不絕。遂爲關輔之郊。百姓乃詣闕上書。乞復置。而鄰城掣其肘。遂不果。公又請之當路。以本縣更錢。供本縣徭費。掣回四千餘金。餘不過數百而已。初公通籍。貽哲年九歲。公問曰。汝不讀書乎。以貲爲郎耶。吾不持一錢。以任爲官耶。吾不能居大位。惟爲汝擇名師。延拜而師之。吾事畢矣。及成進士。命之曰。居官。

清白家世所傳。吾之教汝。何以加諸。於茲勉旃。不亦寶乎。及繇淮之蜀。公曰。汝今爲法官矣。法可倚耶。嘗聞先正有言曰。吾履官不監肆。恐根基淺薄。不思培養。而敢戕害乎。居嘗稱說前輩有名臣言行。則舉以示之。曰。看前輩規模何如。若近時務爲名高。卽博風裁。有虛譽。吾不欲觀之矣。吾人行事。使有識之士。心非而竊笑。便不可當。人皆以爲名言。公素健飯。貽哲不敢離子舍。戊午元旦。公曰。爾可出矣。爲我報朝廷。八月始辦嚴而北。復以大義責之曰。國家多事。果用汝。無以我爲念。己未貽哲補廣西。公遂病。貽哲抵家。則平愈矣。已而復病。忽夜三更起。謂從者曰。適有道士視我。飲茶一杯。腹內覺寬。天明。語貽哲物色之。先是有繡髻道士。具悉公之病。且曰。我能治之。而門者不爲通。曰。我以三更往。至是使人追之三十里。鄉人具述道士之言。曰。劉且遣人追我矣。再追之。竟不及也。公卒時。端坐而瞑。啓手足。色膚淨潔如新浴。卽病中未嘗吟呻作苦也。卒之日。遠邇無識不識。無不嗟嘆涕泣。袒免而服。臨者三千人。邑博士率朋徒。具衣冠而祭者四百人。猗氏任生。懷浦子也。聞訃而易素績。委貌冠素裳。設位於西。旦夕哭。鄉鄰感動。且曰。服心喪三年。訃至汝上。崇太妃國王而下。以及中外士紳。無不歔歔流涕。王遣官爲位於左史公祠。哭臨四十九日乃已。且以公配食焉。公孝性天至。生則承顏順志。沒則事死如生。八十而慕。每忌日。哀泣之容如初。弱冠而仕。囊無一錢。篋無一物。然清而不刻。廉而不倨。古人有清畏人知者。公不自知其清也。持名信不作一欺人語。爲人謀。雖至難事。竟成。至誠之能動物也。力行厚道。趣人之急。甚於己。古人視人惟己。公

不知有己也。德之感人，無間賢愚，無不積頌，而積於冥冥者尤厚。鄉黨之間，不名蓋敬之至也。况乎五十而隱，五十而鰥，玄髮貞心，三十年如一日，以輩古人，可多得哉。公配淑人墨氏，父希禮，母劉氏。以嘉靖辛丑二月初四日生。淑人慧敏端莊，甫數歲，即異於諸女。父母愛之，李宜人以母家鄰舍，知其賢。左史公又以世親，遂結婚姻之約。年十五，父母送之汝上，習勞執勤，奉翁姑，能以婦道共事。平明入爨舍，炊食之器，無不洮汰。每從姑問翁所欲食，務求甘毳，或一飯不適口，聞之皇皇如也。侍於姑側，米鹽瑣屑，無不稟命而行，小心柔氣，言語之聲，不聞於閫外。傳婢不直意，笞罵不敢加。李宜人有三女，夫婦皆從中饋訖，便以女紅佐諸姑。諸姑各有子女，撫摩懇至，無不厭其意。各有懽心，而李宜人大悅。公肄業別館，供盤案，具飲食，惟恐官學之不成也。李宜人性方嚴，或有不懌，劉公必具冠裳，與淑人長跪而勸之，色喜而後起。三受封而依然荆布，不知其貴倨也。淑人之孝於舅姑，與劉公無異。然淑人之事父母，故極孝。父母壽皆八十餘終，而猶以隨劉公之任，未得永訣爲痛。弟有女，愛之曰：「此吾父母之所愛也。」其治家井井秩秩。劉公得以一意於勤官，雖貴而能貧，而養父母，供賓客，周恤親舊，不知其爲貧也。淑人卒，劉公哭之不勝慟，曰：「爲吾兩親送終者，淑人也。」今又以吾親而病死，吾何忍再娶哉。蓋左史公沒，無以爲葬。淑人憂之，成病云。劉公援筆而誓，累累數百言，泣而納之柩中。終其身，竟無一侍者。劉者卒於萬曆庚申五月七日，距其生得年八十有三。墨宜人生於嘉靖辛丑二月四日，卒於萬曆庚寅十二月十四日，得年五十歲。生子二，長復

初卽貽哲。癸未進士。廣西僉事。娶肅氏。四川敘州府知府。自修公女。故贈安人。繼胡氏。南京都察院御史。嘉謨女。亦故喬氏。廣平府知府。因羽女。湖廣提學世甯孫也。封安人。故王氏。孝廉曷女。次復祖。娶文氏。冀州學正。運開女。禮部主事在中。翰林院庶吉士在茲妹也。女一。適山東萊蕪縣知縣宋完子。一韓。早卒。孫三。長元允。早卒。娶雷氏。山西聞喜縣知縣。復豫女。次詵允。邑附學生。娶李氏。趙州諸生思戢女。御史應元姪也。昌允。聘某。而昌允嗣復祖。公命也。孫女二。長字四川保甯府知府武紹祖子惺。次字某。卜以庚申仲冬十九日。合葬於峭馬營。倂來屬余爲狀。蓋公爲戶部時。余遊成均。公命貽哲從余受尙書。及余釋褐。司理汝南。則左史公方在汝南。公父子祖孫。與余游處最久。相知極深。余嘗爲左史公狀矣。左史公厚德人也。公事親之孝。卽閔曾莫加焉。左史公沒後。公以祠堂爲子舍。多年不歸。客計甚蕭屑。人罕喻其意者。卽余亦爲詩諷之。旣而崇王薨。世子未有子。公爲求得巢縣孫竹墟者。妙於形家。令之遷葬。三年而世子有子。今冊立爲王。次爲郡王。公乃西歸。余聞之嘆曰。公之久留汝南。蓋以左史公相崇三十餘年。受恩厚。欲得其當而報之也。然足以爲報矣。詩云。欲報之德。昊天罔極。公之報德也。可謂盡其心力矣。何其孝也。惟孝故厚。公於人無所不厚。往往過厚。或以爲不必至此。然公天性固然。非人所能學也。人容有負之者。公決無負人之理。况能負其親之所事乎。假令公爲公卿。甯能負國家哉。而世莫能大用。公亦不欲出山。其篤倫常。厚風俗。功亦不細矣。貽哲所述極詳。猶不足以盡公之盛德。然志文不能悉載也。余久病初起。不

敢苦思。聊取其卓犖大者著之。左史公與公皆厚德古人也。相繼而逝。天下皆今人也已矣。投翰歎息。泫然隕涕。豈惟世交之情哉。

明封文林郎知縣喬公暨配王孺人行狀

喬公名輔世。字德夫。別號樂天。其先出樂平。莊簡公之族也。洪武初有名士進者。隨母喬媼至臨城家焉。士進精醫。爲醫學訓科。有辨護材。署趙州鄆城驛。時州官皆缺。士進居守。州人賴之。士進生景新。爲義民官。有父風。景新生興。以齒德飲於鄉。興生深。惻怛愛人。歲饑。捐粟二千石賑拯。全活甚衆。深生直。成化丙午舉於鄉。爲江西龍泉令。誓心清白。告歸至臨清。囊罄。從親知貸二十金。乃能抵舍。直生宗華。以歲貢授山東濟陽丞。明斷慈惠。上下稱之。卒於官。宗華娶班生公。有異資。年十二。補弟子員。其學無不通涉。高視遠舉。不與俗同。然就試數躓。公亦棄去。諸生業專精。性理之學。子侍御君宰中牟。考績。封公如其官。公天性方格。事親甚孝。執喪哀毀踰禮。孫氏之邱姊子志義。生數月。分宅推哺。姊之節立。孫之孤成。志義後仕爲學博。族之鰥寡孤獨。多方周恤。無失所者。一二借名厲威。或以告公。德則吾族。彼人非也。罵與罵。扑與扑。於我何有。其訟之官者。掠治倍之。以是無敢目攝人。谷遷喬公比鄰也。貧欲鬻宅。公不忍其他徙。時時周急。得長爲公鄰焉。穀賤則增價以糴。穀貴則減價以糶。歲饑。傭人日覓一錢不得。輒加四五。不問他邑。濱泚水。數畱城。公輸資鑄二鐵人。二鐵牛。鎮之。後竟無患。而韓家莊山水無所洩。蕩田瀦屋。甚割也。公

捐田鑿渠。千家安枕。又勸建義學。郡邑之子弟。孫自達等數十人。延師都授。翩翩可觀矣。公天性澹簡。無聲色貨利浮靡之好。身爲封君。子爲侍御。飲食不溇。章服亦以布爲之。曰。聊以明朝典耳。不肯見有司賓客。讌飲不赴。其接引鄉人後生。恩禮甚周。出無車僕。夏月之田間。持葵蒲扇自翳。行若流雲。遇水褰裳以涉。行道者不知其封君也。侍御君奉命。持斧巡郡國者三。每過里。卽於大門之外。發其行李。簡無長物。乃命之入。而侍御君巡三晉時。有薦紳託所知入京者。寄一扇及桑椹膏一瓶。所知爲之堅請。竟辭不受。公讀書談道。老而不倦。克己省身。死而後已。是以遠邇之人。無不親愛樂推。鄉鄰之鬪。片言明白。革心歸善。里人之言曰。鄉士大夫咸若喬公者。百家非多。千年非久。卒之夜。婚友夢盛儀廣樂。迎請東行。蓋萬厯二十一年癸巳十一月之望也。聞者無老幼智愚貴賤。皆累欬墮淚。閏十一月之十九日。公配王孺人亦卒。王孺人者。與公同受封者也。世爲邑望族。父讓爲王府典膳。娶於戴。以正德五年九月二十七日生孺人。端重靚嫵。能通論語大學諸書。年十七。歸喬公。時濟陽公爲國子。喬公爲弟子員。家用詘。孺人極意勤儉。佐喬公力學。濟陽君之卒也。孺人奉姑班唯謹。姑喜甚。每以子與婦皆慕孝云。喬公葬父母厚。家用益詘。孺人愈益勤儉。屢遭凶歲。備極艱苦。有石溜之田二頃。距家十里許。孺人徒步視耕穫。曾不告勞。喬公性喜酒。孺人躬釀酒。必香必潔。公謀酒無不得者。公嘗它往。有強禦侮其門。孺人戒諸兒女。此不足與稽。而父來毋告也。其達理如此。喬公生於正德四年六月初六日。距卒之日。壽八十有五。孺人八十有四。子

男三。南星。邑諸生。娶經歷李昂女。卒。北星。後更爲璧星。卽侍御君。娶處士陳嘉誥女。陳卒。繼娶甯晉處士高凌寬女。中星。武舉生。娶邑廩生張維垣女。女二。一適閩佳士卒。一適張鑑。孫男五。如岡。聘邑諸生張誥女。如牛。俱璧星出。如陵。娶邑廩生劉鴻漸女。如雲。如虹。俱中星出。孫女三。一適邑廩生趙志鶚。南星出一字儒士薛士男。一字邑諸生呂崇禮男。俱中星出。侍御君屬余爲狀。余與侍御君里閭相接。少同硯席。知喬公與儒人之德甚備。喬公剛方。得之天性。又成之以學。剛方故無欲。無欲故能一體萬物。一體萬物則心大矣。心大故樂。嘗自讚曰。布衣適體。蔬食療饑。形寄塵寰。心合太虛。有味乎其言之也。故其自號曰樂天。蓋公之所得者深矣。公卒未幾。邑縉紳父老博士諸弟子。合詞請於當道。以公春秋祀鄉賢祠。古云。大賢之德。長公之謂也。王孺人配德相成。萊鴻並美。而又食報於子。天命有德。章服斯光。旣壽旣考。乘化同歸。而遠邇懷歎不已。豈非宏道之徵哉。

王先生行狀

己丑冬。余官選部郎。友人姜仲文。以計部郎請告還。感概時事。各上一疏。頗忤貴人。爲言官所劾。余過仲文。則王先生在焉。仲文所剖心析肝而言。妻子所不得聞也。余睹王先生之貌。察其言。忠義英爽。杯酒之間。而交如仲文。旣而余歸鄆上。王先生再來過之。厥後得仲文書。王先生成古人。子光台幼。仲文撫之。延師教之。扑戒之。一如諸子。光台稍長。字之曰敬平。敬平補諸生。仲文起家江西參藩。光台持書來。余留之。

與兒童會文。久之。求余爲其父狀。狀曰。王先生諱機。字子發。別號太玄。山陰諸生也。父一恆。故有名諸生。高才多學。善譚論。能摘詞。早嬰廢疾。平晝愴歎曰。天乎。何以生我而竟爲臃腫於世。兒甚慧。其克成吾志乎。王先生年十九而父見背。母謝先卒。所遺田產。爲從昆所吞噬。耽耽於王先生。欲削迹無遺根。王先生跳之北方。至桃源而資斧都盡。遇故人留之。讀書其家。業大進。歸而娶阮生敬平。母子依舅氏。而先生學於京師。其時君子方滿朝。尙未彫落。而吳中尤盛。王先生皆相往來。睹其儀刑。聞其議論。以是問學日進。文日高。其鄉有貴人。門客甚多。或勸之往見。曰。足下以我貧。欲分其雞鶩之粟耶。不曰。願領何傷乎。蓋王先生少其人。後竟敗。今天下尤多游客。大都趨勢利。與鳥雀翔集。蓬蒿盛衰。何知仁義。王先生所交。皆海內名士。不以榮瘁渝志。此殆孟子所語句踐之游者耶。王先生丁酉預秋試。有司賞其文。欲薦之而不果。王先生生於勞苦。見命數不利。自是精消意隕矣。至庚子大病。謂敬平之母曰。余生平受諸君子之教。無愧心事。子孫必不至零落。余所厚。無如丹陽高邑。光台他日可往依之。卒時年五十三。是年二月六日也。王先生有三男子。長卽敬平。娶胡氏。次光雍。殤。次光鼎。幼。先是余聞王先生之卒。爲之涕淚曰。世安得此好與賢達游。不避風雨者。安得此貧而不頹其志。白視眼醜貴者。安得此一與人交。白頭如一日。萬里如接席者。蓋余平生與仲文尺牘。多謔語。王先生皆能誦之於口。輒爲絕倒。嗟乎。王先生竟死矣。往者與之飲東園。談及浙中一貴人。有名於縉紳間。王先生曰。是人居鄉極惡。而士大夫稱之。知人難矣哉。古者所

以取士於鄉也。余甚服其篤論。王先生殊能知人。故所交游皆君子。敬平以甲辰仲冬來。是年北方雨雪之多。七八十老人所未嘗見。天氣絕寒。手足瘃裂。敬平文弱。不意能遠至。居三月。值吾鄉豺虎橫行。咆哮殘賊。不忍聞見。余日閉門歎息。敬平以爲不來此。幾不知世上竟有此等事。髮爲之上指。其忠義英爽有父風。王氏三世讀書。皆高才生。祖父皆不利。與其在茲乎。輒述其真知王先生者語敬平。焚之於其墓前也。

祭文

祭李于田文

嗚呼天之生吾兄也何爲哉。忠心義概。壯猷沈略。亦旣見之於世矣。入爲本兵。未幾而病。病連連。縣縣竟不起。天之生吾兄。其爲國家耶。天下未卽無事也。豈可遽去哉。始吾聞兄之病而愈也。則數問自長安來者。曰自病起而鬚髮遂白。面容遂槁。言語遂吃。口吐舌舉者。良久而後發。步履遂蹣跚而乍卻。而書札之來漸少。卽來多非手書。又寥寥無復向之情致也。則深以爲慮。而兄果不起也。天之生此豪傑何爲哉。然則天亦何必奪之也。是時天下雖未有事。而庶位已空虛。蒼赤已倒懸。紀綱已廢亂。禮義廉恥已銷亡。世道人心已壞。政事已盡弛。其最急者。有言不得上聞。賢不肖是非隨人所議。而無所取決。大言雷鳴。小

言蠅營賢者垂首。智士吞聲。然則兄卽長存。寇犯而隨破。賊起而旋平。恐亦無以維將衰之運。救舟輿之傾也。故天不欲其在朝。而俛俛昂昂者。一旦山頽而松仆。嗚呼。何忍言哉。聞兄之變。日使人偵之。欒城欲撫棺一哭。而有言。兄自東路歸。已抵家者。不能如願。疲病之人。又不能千里赴弔。我心之憂。豈惟友朋。嗚呼哀哉。尙鑒。

祭大司馬健菴劉公文

昔癸未之冬。星副司功之籓。與公同署。寸陰未移。而情洽鳬藻。時叔定弱齡奇秀。公每出其文。俾評騭之。聯世講之誼。居久之。則丁侍御此呂發故相科舉之弊。太宰楊公手自草書劾侍御。密以示公。唾其耳。蓋慮星知之。公不余隱也。余不直楊公。而語趙太史用賢。王給事士性諸人救侍御。其詆楊公太甚。楊公大怒。星遂稱病歸。然楊公終善人。聽余歸。亦不遷怒於公。是時余幾爲公累。公不余銜也。而交好益篤。戊子余再入署。年所而以封事忤貴人。稱病歸。公以兩大人之變。相繼廬處。至壬辰而余三入署。明年以管內察。大忤貴人。削籍歸。公入典選。過鄙上蒲城楊戶部上章劾公。及顧叔時與星受賊甚多。其所劾公者。云過鄙上縱談三日。若以公典選時所簡拔爭引。或用余傳臆之說。欲以射太倉諸人之意。諸人以新逐余。聊容之。是時余又幾爲公累。公又不余銜也。公山居時多。每過趙。則枉道鄙上。卽家居。亦數以叔定文來。命評騭之。公撫薊門。數以書來。訝余之未出山也。然公亦不得入朝。操行之同。亦可略見矣。公得入朝。其

所挽回世道。必有過於人者。公竟逝矣。其憂時未已耶。其以幽明旣隔。不復爲念耶。叔定有戴翼之略。而尊節式高。不必隨俗偷富貴。其足以成公之志無疑。公統均之猷。見於典選。安攘之績。著於仗鉞。忠赤之心。形乎奏牘。皆足載之惇史。昭垂來代。而又有叔定爲之子。親見其成進士。又何必自入朝。又何必上壽。靈輶繇東路。星未得一哭。而病曳不能赴弔。千里陳詞。略敘平生。公其鑒之。尙饗。

祭魏中丞文

仁兄之自晉而歸。過我東園。其時頗有衰相。非復入晉之時。然神氣自健。抵里之後。漸聞多病。仁兄以匡時救世爲懷。而人之無良。民之無祿。莫甚於此時。仁兄剛方之性。不能自遣。星固私憂之。旣而得書云有瘳矣。星欣喜之情。見之於詩。何乃竟不起耶。仁兄以忠孝之人。當不毀之時。遭伯父之變。而又憂國憫人。傷剝心肝。是以性命不長耶。嗟乎。當今之人。旣已不能容仁兄於朝矣。仁兄而在。君子猶有所期望。小人猶有所愧畏。今想望者絕矣。愧畏者快矣。六十有餘歲。豈爲老耶。彼蒼天者。能壽召公。壽曾子。何其明也。仁兄之德。何讓召公曾子。而奪之之速。又何其蔽也。意者其不欲平治天下耶。有賢而無用者。天下之亂自若也。何必其奪之也。嗟乎。仁兄其何所之耶。豈其如龍如虎之人。而一旦澌盡無所知耶。若其有知。其於世之嫉賢害國之徒。何不奏之上帝祖宗。剿絕之。默佑我聖明。而拯蒼生。安社稷耶。抑運數有定。非人之所能爲耶。憶昔仁兄理荊州。星理汝南。未相識也。仁兄貽我以書。示我以詩。油然接引之意。厥後遇於

長安情好日隆。癸巳內察之役。助我實多。既而見螫宰執。星謂仁兄必無救我。無益徒重之毒。仁兄曰。吾之出。非爲富貴。此事何得不言。竟上章數執政之過。星削迹家居。仁兄撫晉。復以災異陳言。薦星可用。語侵執政。執政益怒。進則閉門。退則繫馬。吾鄉直指。與閹人比而害仁兄。射讎者之意。非人神交助。則亦岌岌危矣。蓋仁兄之輕去就。利害以爲星者如此。昔祁奚申叔向之枉。楊喬表孟嘗之忠。仁兄之誼。不謝古賢。星雖不肖。庶幾借以不朽矣。夫以道。則國之棟。薨士之師表。天地之正氣也。以恩。則星之知己也。星非仁兄之哭而誰哭哉。星昔所患漸平。然未堪遠涉。不能詣仁兄前。撫棺一哭。而第哭諸走南樂道。嗚呼哀哉。

祭魏懋權文

嗚呼。人生如幻。豈不信哉。昔在長安。與懋權比鄰。朝夕相見。以德業相切劘。逮今年春。余將告歸。懋權欲同歸。以有所待。不果。登都之日。送我毘廬之閣。徘徊竟日。抗手言別。不以爲悲。謂相望之局。而解攜之暫也。彼其時。吾二人皆甯知遂永絕哉。向使懋權知且死。胡不同歸死於家。一與老親別。向使余知懋權且死。胡不緩須臾無歸。爲懋權佐喪也。嗚呼哀哉。人多惜懋權之年四十而早夭。栖遲郎署。莫究其蘊。吾以爲年與位何盡之有。懋權剛氣烈心。得之性有。見善若賞。疾惡若讎。一日而在。足使君子有所恃而爲善。小人有所畏而不敢爲惡。卽敢爲惡。而其心未始無畏。乃溘死非其年。使小人以爲幸。而君子者若騁之。

無靳也。嗚呼哀哉。人之好諛。未有諛鬼者也。吾雖勉爲善。剛大之氣。高曠之識。不及懋權遠甚。每一見懋權。未嘗不爽然自失。已而暢然得意也。時與懋權俱。維我使直。庶以未死之年。能有所進。懋權竟舍我逝矣。雖萬萬不敢負懋權。如孱弱何哉。昔懋權寓書汝南。稱閩人劉廷蘭。吳人顧憲成。蹈節拔俗。死生以之者也。去年劉生死。今年懋權又死。蕭艾日加。叢蘭萎絕。豈不悲哉。嗚呼懋權已矣。羣喙譁譁。世道日非矣。搏黍交爭。託之孔孟。不知所終矣。卽欲再見懋權。扼腕而洩其不平。亦不可得矣。俯仰六合。能無浩歎。嗚呼哀哉。

祭雷慕菴年兄文

甄才傑于往牒兮。唉斯人之多艱。世幹弃而不寶兮。乃溷濁之固然。彼皇天之聰明兮。胡不顧綏而舍旃。美挺出於神皋兮。氣菲菲其若蘭。幼紉忠而佩孝兮。履正直而爲憲。紛瑰才之稱美兮。允朝家之寶臣。竭司直於天門兮。心搏搏以亮直。摩九雲以擊姦兮。夫何愛乎翹翼。滌宮鄰之餘氛兮。於昭荃之休德。抱練情而貴我兮。薄時俗之佻巧。發玉軛返故居兮。蹇二華之瑤草。卻弓招而自疏兮。解塵勞之紹繚。嗟玉斗之無樞兮。幸美人之未老。何旣隱而長逝兮。併邱中其如掃。豈上帝之催良兮。抑鬼伯之弗昭也。自余美之旣潛兮。睹時俗之日妖也。婦于思而赤舌兮。桐徽猛而自豪也。謂鵠元而烏皓兮。和聲翕其如蜩。余叩誠而杼款兮。斯衆兆之所嘖也。冀律魁之肯來兮。或魂淒之可臧。諒頽波之不還兮。俾世得聞乎歸昌。當

艾蹠蹠以茂豫兮。蘭槐常夏而隕霜。胡家運之方否兮。而肖子湓以流亡。彼流俗輕賢俊兮。余心獨兮。盡傷。倘帝關其可籲兮。豈皇輿之可忘。

祭郭草堂憲副文

嗟嗟郭公。何遽逝耶。宿昔無恙。何遽厲耶。天耶命耶。抑憤悲耶。居喪哀毀。殉於孝耶。有耦先捐。中心悼耶。有孫而殤。哭之悲耶。骨肉多變。內崩摧耶。嗚呼哀哉。公居家孝友。持己清修。儼朝典於私堂。敦素節於貴游。忠亮體國。勤勞任事。敷歷中外。始終不貳。亭疑法而無冤。若庭堅之作士。河洛沐澤。瀟湘愍惠。爰秉憲於西秦。見文武之質備。方宦業之勤宣。何春華之忽瘁。嗚呼哀哉。念昔與公。生同里閭。結髮相友。膠漆不如。薄遊契闊。神爽長徂。晤語都門。我心孔愉。甯知相見之無幾。而生死之路頓殊。嗚呼哀哉。旅舍岑寂。朔風蕭蕭。故鄉千里。魂不可招。愛子云遠。望父之歸。匍匐長號。乃見靈衣。嗚呼哀哉。來也則人。歸則鬼矣。來則軒車。歸廣柳矣。來使我樂。歸疾首矣。撫棺一哭。送公於行。款款下泉。生死交情。嗚呼哀哉。

祭曰肩張孝廉文

士之生於末世。大都以憤悶死。其著者如徐衍申。徒狄鮑焦之倫。皆不忍須臾之期。瞋目自絕。以辭濁穢。而就冥漠。其餘鬱鬱而歿者。不可勝數。如我曰肩。則其一也。曰肩少挺異資。聲名發越。早舉於鄉。謂可立致青雲之上。而年逾強仕。羈於山草。辛丑之春。夕郎欲薦而不果。攝僕兮不舒。俚倡兮無依。無何而病。是

時余亦病。然余病不起。曰肩遂數年不起。余之憤悶更甚於曰肩。蓋余好以天下之人爲念。而值今之時。所謂賢者。人必以爲不肖。所謂是者。人必以爲非。昔人獻玉而刖。猶有明白之期。今則一名爲石。必不肯改。然則不憤悶而死何待。故以劉文卿之明睿。而不能堪以死也。然以余之憤悶更甚而不死。蓋余憤悶一至。則仰天而哭。無何則又仰天而笑。憤悶之極。化爲頑愚。是以苟活於世。曾數以寬曰肩。而不能活曰肩。是余之罪也。意者人之性情。固亦有不可強者耶。抑亦命運一定。不可移易耶。曰肩竟長別矣。不知曰肩其英爽如平生耶。其淅泯無所有耶。其數盡而還耶。其有召之者耶。其輪迴何所耶。才人豪士與關茸無別耶。念平昔之惠好。憐孤寡之煢煢。感世態之澆薄。能不切剝乎余情。嗚呼哀哉。

祭馮藎軒公文

嗚呼我公。何乃遽逝耶。命有定期耶。抑公之厭此世耶。星與元靖。骨體無媚。祿相俱遭。信中情以切俗。忘柄鑿之方圓。衆人瞋目。惡少張拳。橫被污穢。倡而還。談詒累日。同病相憐。情殷鳧藻。夫豈偶然耶。公與我先君。皆倜儻邁倫。皆抱奇不伸。有子皆幸而青雲。皆不欲爲封君。暫解褐以玩世。卽還山而治隱淪。子亦復拙宦。時俗之所迫然。皆不爲意也。銜杯漱醪。傲睨風塵。壽皆六十八。曾弗克遐臻。何其事合耶。昔我罷歸。先君不他之盡也。唉勤厥身。將璣衡是翼。以海宇之德。彼翩翩緝緝。香腐而明墨。惟是之歎息耳。諒亦公之所同耶。公之未封。元靖所悲。我非木石。而豈忘之。公之榮之。豈其肯辭。倘吾親之長存。甯豎褐

於蓬茨嗟乎嗟乎已矣乎世道險巇公避之矣黎邱之鬼日中而馳矣草木倉唐美人行遲矣茫茫六合若之何其矣人相知心萬古斯須青天白日我輩交期何幽何明何榮何衰傚雨雲而抒情亦以緩棘人之悲也。

祭常誠所馮蘅洲王鍾嵩文

余自丙辰十月心火爲病昏眩疲茶至今年春夏間乃爲起色病中聞公之不祿以爲余亦從此逝矣而司命者紆之自古不遭時之君子觀豺虎之跳梁憫蒼生之塗炭未有不鬱鬱以歿者小人皆以爲隳官脫營之故仲尼雉噫之歌乃係情於司寇孟子不豫之色繇乍失乎萬鍾何足與之辯哉人命微淺已往者倏忽而過將來者能幾何時分宜江陵之得意余所親見也君子之歿也小人幸之爲其害已也然子孫樂以爲祖父小人之死也君子亦幸之爲其害人也然子孫不可以見人夫君子者歿而不朽小人者死而又死者也此其相去遠矣久病初起不能作誄詞略抒所懷尙饗。

祭魏太公文

嗚呼人生而死未有不哀者也而子貢之稱孔子曰其死也哀哀天下孔子之少死卽無孔子非哀其死也是天下之大哀也異乎他人之哀也凡賢者皆然其壽而死也與不壽同哀壽猶位也小人負乘有寇君子愈顯愈光無道不如早已仁者愈久愈芳翁今年九十有六矣聞翁之歿也無不哀也山林朴野之

人年至九十外者容有之。以星所知。士大夫之中。未有壽若翁者也。中丞君兄弟三人皆升第。以中丞最績受封。如其官。福既隆矣。壽既崇矣。然歿有餘哀也。天下之公卿不少也。叔季臣壞之時。更苦其多。翁爲別駕。廉平惠愛。所至人便思之。何必爲公卿。世之科第蟬聯者不少也。孰有如翁生三子者。皆忠臣孝子。端人清士。赫然負當世之望。天下之封君不少矣。大都高屋多田。溽食華衣爲樂耳。是皆翁之所不好也。惟以道德文章氣節教子孫。而式後進。鄉黨之貧者賴其周恤。暴者被其德化。此翁之所以爲封君也。雖長生久視。豈有厭哉。客歲冬。中丞君書來。言仲冬二十日爲翁初度。中丞君率諸孫八人曾孫十數人稱觴。翁猶能與諸賓昏同拜起也。星報書。欲及犬馬之病稍愈。卽往拜翁堂下。竊至人之靈氣。何意翁遂乘化而徂耶。星今者尙未能匍匐拜翁之几筵也。嗟乎嗟乎。星之與中丞君兄弟。蘭茝膠漆之義。翁之所知也。翁之歿也。有識同哀。况於情深猶子者乎。然無能奮飛。敷衽陳詞。聊抒我哀。嗚呼哀哉。

祭李太公文

嗚呼咄嗟。異哉翁之弗延也。履得意之極。而大命歛捐。弗後弗先。禔福寡二。棄之而卽重泉。異哉古稱憂喜聚門。吉凶同城。固也。然亦世所罕有。乃見之於今日。又皆其極者焉。疆場匪制。楊酋稱亂。舉國震驚。倖脫巧竄。起中丞於田間。賜劍徂以芟難。中丞桓桓。出師總楚。蜀滇十萬者三之。如虎如貔。如熊如羆。怒而刺其爪牙。何螳螂之能支。授首有日。而翁之計以遐馳。異哉。驚崩摧以斷絕。幾遺賊而自逝。旋嬋媛

以寬譬明君父之無二。引大義以暫割。有魯公之陳事。爰墨縗以讀列。旋殄滅之無類。乃陳厥情。將奔於家。皇既允之。匪崎匪遐。然迪簡夫攸代。杳無時而及瓜。兄先歿之未幾。母煢煢而在堂。獨匏繫於天隅。其誰代之任喪。內子隨而不歸。猶未暇以悼亡。異哉。息縣縣以連連。骨柴立以支牀。何已苴之嶮嶮。魂飛越而還鄉。恐遂離乎柏幹。快叛賊於幽房。嗟大兵之釀災。矧毒淫之南荒。一二參佐以斃。新鬼哭而宵行。恐性命之不融。撫幼子而自傷。餘一載而志絕。忽承惠以還歸。遽修塗之孔艱。羨晨風之遄飛。造舊廬而再入。見披披之靈衣。昔恍惚而引領。竟永隔乎容輝。異哉。翁孝友性植。寬惠謙抑。趙魏之間。頌其厚德。中丞衣乎庭訓。爲國宣力。忠孝光於四海。謀略著於社稷。天不憖遺。長夜遂卽。億兆歌舞。一家痛靈。勝美挈而不完。天日黯而無色。星與中丞。郁若兄弟。相狎相重。同氣同聲。恨未翁見。一拜於庭。此世已矣。念之骨驚。願言動輪。病弗克從。奠茲一殤。存歿之情。

祭崔封君文

嗚呼。翁其定已耶。翁何遽已耶。星自交於侍御君也。客之自長垣來者。星每問翁何爲。則曰。翁優游養高。輕財好施。比歲不登。所全活人甚多。星則甚喜。宜其有侍御君也。則又問翁健否。則曰。翁樂易饒興會。每與客談笑接。情瀾不竭。則又甚喜。是上壽之符也。而侍御君曰。公蓋少業儒而貧。讀書甚苦。有道士欲傳以黃冶之術。固卻不受。昨者某之按蜀也。饋帥饋之千金而不受。翁之取於造物者。其少如此。則亦不

盜於造物。享年宜未艾也。而何乃遽已耶。星昔薄遊於朝。得交待御君。見其光明磊落。心敬愛之。自以椎魯寡儕。不敢望君之知之也。相聚之日又淺。侍御君持斧郡國。萍飄雨散。無何而星忤時。就里人之次。侍御君驄馬往來。則必迂道過之。戊戌遭家大人之艱。儼然臨弔。問勞甚備。相知日深。情好日密。星引廢十年。嚮之把臂論心者。往往棄如遺迹。侍御君同朝若不相知。廢棄乃愈隆。此意豈今人哉。星安得不感激。年來每欲竹冠蘭襟。往拜我翁於堂。而情竄偷安。蹉跎至今。且多病矣。翁之年未老也。精神素健也。而何乃遽已耶。古之人千里赴弔者。彼皆以相與厚也。侍御君於星。豈不至厚哉。而病不能往也。其何以爲情耶。微薄之奠。以將明信。重增不與之哀。嗚呼哀哉。

祭明誥封李老伯母吳太夫人文

嗚呼。伯母竟長逝矣。星登堂之拜。非今世矣。多病疲茶。復不能會葬。一望丹旆而撫靈輜也。星弱冠釋褐。臥病長安。我司馬兄就榻前問之。投分定交。迄於今茲。久而彌篤。老而不衰。人家之兄弟相閱者多矣。吾二人在兄弟中。其致美者也。父母之心。莫不欲其子之貴顯。天下之大官不少矣。然或得罪名教。以爲父母之羞。其容容持祿者。亦無取焉。司馬結髮束脩。蘭清璧素。見重士林。槐棘之司。允爲無忝。且能外摧強敵。內剽叛亂。功在社稷。賞延苗裔。德福之隆。忠孝之盛。伯母之教也。司馬征播時。債帥以肥金美銀甚多。白玉爲帶。餽於家。伯母糞土視之。吐之不納。此士大夫所難。尤今之士大夫所難。伯母親行之。卽平時所

以教司馬者可知矣。播州之功旣成，治河之功卽敘。伯母皆親見之。朝家之異數，皆親被之。世之爲母者，若此有幾？以星言之，第漸漬於司馬，以無大穢耳。狂瞽忤時，勲業未立，父母之心未必無鬱鬱也。如我伯母者，復何所憾哉？當今世道人心大壞，不論賢不肖，惟見居大官者可以安枕，卽如南樂魏中丞、正人君子，吾兄弟所厚，伯母所知也。終養而歸，未是無官。惡少年且窘辱之，若不聞其盛名，曾爲中丞者，甯復憐其衰疾乎？魏大如此，豈況星鄉曲之人？禁錮於時者哉？司馬建與國咸休之功，封侯有日，星且藉其餘威，以免轆轤，孰非我伯母之慈覆哉？乃生不能一拜，沒不能一弔也。星其何以爲心耶？病如不死，會當拜於墓下，以舒微誠。伯母其鑒之，尙饗。

祭孫母司太恭人文

炎德孔嘉，麗於南維。醞靈釀和，權輿迄茲。景福胙蠻，命世協期。曷開厥祥，乃有碩人。素霜伴潔，青蘭比芬。鳳鳥導言，萊鴻是嬪。才允克相，鷄鳴靡息。執雌持下，內外序別。綢繆之飾，心兮如結。曰余無儀，榮間秘辭。用能有子，逸偉罕雙。道體次聖，文緯羣龍。早陟玉堂，名實炳著。天門司直，風采高世。崇亮璣衡，俯式士類。三趾陳修，神人藉乂。天子曰都，母氏之刑。錫榮有章，揚德以名。績茂寵深，南望阻修。萊舞仙仙，可以忘憂。爰得請告，返於梓里。帝思股肱，徵而不起。畏此簡書，同德可恃。母曰異哉，往無滯淫。返哺靡及，何能異林。母甯子仕，朝野之心。胡爲不延，棄此昭昭。夜光可育，蕙草長彫。訃音北邁，萬里崇朝。奄動皇卹，降典九幽。

辱在寮采。中心怊怊。匪命不融。德則如阜。匪福不庶。孝慕永久。棘人呱泣。空堂虛牖。悲往念居。愁雲莽莽。神馳無遠。奠此絮酒。

祭李杞泉文

天下承平久。文吏之輕武弁極矣。余弱冠通籍。自以起家章句。不足爲文。絕不敢有所輕重也。然性本落落。亦罕所交與。君之交於余三十年矣。則以君之雅度可聯席也。誠實不欺。可接談也。行已不污。可爲侶也。豈勢力哉。往者稅監之稔。百姓羣起而操刃。稅監避於君家。以免同輩。遂誣君與之結爲兄弟。當事者彈之。以控於余。余語沈太素方伯曰。昔楚之稅監。曾如此避之楚藩。楚藩匿之。蓋不敢不匿也。况武弁乎。假令稅監叩門。李君不納。而令百姓殺之。則與殺之者同罪矣。沈公深然余言。遂爲昭雪。余之言出於良心公道。非欲君之感也。君乃感余甚深。是以知君異於世之濟川戕舟者也。近日同輩。乘君之督運。而罔上行私。以奪之印。余爲白之當事。而非若太素之相信也。反以君爲妄爭而鑄譙之。無何而聞君棄世矣。豈其有所忿志不平而然也。今天下不平之事無數。君不見夫遼東之事乎。杜將軍之忠也。之勇也。之廉也。以身殉國。而論者猶以爲罪。不容後人之申理。他何言哉。君可訴之鬼神耳。鬼神與人均此世界。其亦若居官者有遷轉更易耶。其黠者或亦有謀人之位而奪之者耶。今善類多殃。淫人多福。正不知今之鬼神。其公私明闇定何如耳。人之善惡。自知甚真。何必人知。何必有福。人情反覆。朝恩夕讎。而君之與余。三

十年如一日也。聞君之歿，能無痛哉！遣使酹酒，以見交情。

祭內兄馮伯亨文

嗟嗟我兄，溘焉遽逝耶！星蓋以兄爲宜壽也。兄坦性直心，若海童之無機，則宜壽。茲祥博大，與物無忤，則宜壽。自星所親見，我外父母及仲昌兄夫婦，兄之室五人相繼而歿，能至五十者，獨有仲昌嫂氏耳。兒女早夭者，無論也。斯亦門祚之極衰矣。若天運旣周而復，其周也屢矣。則宜壽。而兄故神氣有餘，平生少病，曾與星言及死喪之類，悲歎者久之。星曰：壽鍾於兄矣。兄亦自以爲宜壽也。何乃一病而逝耶？兄之年六十有二，比之先逝者，則壽矣。然星聞兄之病，絕不意其不起也。星自弱冠，與兄游處，每一相過，連朝累夕，與二三酒人縱飲歡呼，驚花動竹，跳月嬉烟，自入宦塗，此事遂廢。忤時而歸，古歡再續。十六年閒，儔侶漸凋，猶賴有兄，相與暢幽懷，敘情事，賞良辰，探名勝，付理亂於杯杓，輕世事於莞爾。今兄復舍我去矣。貴人吾不求，彼亦不吾求，新知已無望，後進不可狎，鬱伊乎吾其誰與？嗟嗟我兄，溘焉逝矣。昔也承飲，今則祭矣。丹旆在門，將歸九泉，一哭相送，已矣何言？嗚呼哀哉，尙饗。

味檠齋文集卷十五

遺筆

漢高祖

夫天生民而爲之立君以司牧之。莫知其所始。蓋自有夫婦父子始矣。司牧者必仁人也。遠古之時。風氣未開。天下無事。仁人之功不顯。五帝而後。民生多艱。洪水滔天。而禹抑之。以有天下。桀爲暴虐。而湯放之。以有天下。紂之暴虐甚於桀。而武王伐之。以有天下。雖有揖讓征伐之異。皆不忍民之愁苦死亡。而忘身以救之。民皆愛戴歸往。欲以爲君。有不可得而辭者。故其享國皆長久。而周至八百六十餘年。平王東遷。王室微弱。天子徒寄空名於天下。諸侯雖互相吞噬。而終不敢加兵於周。至秦昭王。乃始攻周而滅之。此數百年諸侯所不敢爲之惡也。而秦爲之。至呂政盡滅六國。而稱始皇。焚經籍。坑儒生。舉前乎此後乎此千萬世人所不敢爲之惡。而秦爲之。此天地之大變。而斯世斯民視爲寇讐。欲殺之而不能。欲逃之而無所者也。至二世惡篤而身亡。豪傑並起而亡秦族。漢高祖起兵於沛以應之。受命懷王。入關而破秦。與父老約。除秦苛法。此其救民之功。不減湯武。秦民皆欲以爲君。第其所以救民者。非有王者惻隱之真心。以

爲如是而後可以收人心。取天下耳。當此時而無項籍。則高祖遂有天下矣。彼項籍者。負其氣力。視高祖蔑如也。而廓達之度。知人之明。不如高祖。非萬乘之才也。故謀臣良將。往往去之。而歸高祖。高祖以蕭何之言。拜韓信爲大將。此其人足以當項籍。非他將所及也。卒賴之以誅項籍。而成帝業。高祖亦自謂所以得天下者。以能用三傑。韓信其一也。天下既定。而疑其謀反。遂誅之。夷其三族。彭越黥布不自安。皆以謀反誅。何其忍也。且秦之苛法。無過於夷三族者。而乃用之於功成。此豈仁人之所爲耶。及其晚節。乃以戚姬之寵。欲廢太子。太子者。惠帝也。呂氏歸高祖於微時。而生惠帝。惠帝仁孝。無失德。而高祖欲廢之。則亦無恩於妻子矣。所以然者。繇其無惻隱之真心故也。如有惻隱之真心。則於民無弗愛也。而況於羣臣乎。而況於妻子乎。高祖皆忍之。及呂后劫張良爲安太子之計。乃令太子聘四皓以爲羽翼。而太子得不廢。然豈所以安劉氏乎。高祖崩。呂后卽人彘戚姬。鳩殺如意。惠帝以憂憤死。而諸呂皆王。向非呂后旋崩。則劉氏必無噍類。漢之社稷。恐非平勃之所能安也。張良智謀之士。不過隨事補苴。如治水者。能盜息壤以遏潰溢。而壅於此。必潰於彼。終不若大禹因勢道之。使水得其性。悠遠長懷。而歸於海也。論者謂高祖以不事詩書故。以伯王之道難之。夫以人主之崇高逸樂。而欲其事詩書甚難。適見謂迂闊而取厭棄耳。士君子幸而遇主如高祖者。惟朝夕論思。以仁道啓沃之。感動其惻隱之真心。曰如是而後海宇禔福。社稷靈長。名號與三王並美。明主倘有合焉。庶可以安天下之民哉。

先主取益州

先主之取益州。孔明之本謀也。孔明初見先主於隆中。卽言益州險塞。沃野千里。天府之地。劉璋闇弱。民殷國富。而不知存卹。智能之士。思得明君。將軍帝室之胄。信義著於四海。若跨有荊益。保其巖阻。結好孫權。則漢室可興矣。厥後法正以劉璋之不能用。勸璋結備以討張魯。璋遣正往迎之。正陰勸備取益州。備猶不忍。奈何失信義於天下。而龐統亦勸之。其計遂決。蘇子瞻謂孔明仁義詐力。雜用以取天下。與曹操異者幾希。其論固正。然未知先主孔明之苦心也。夫先主初起。曾無十戶之聚。以嘗與公孫瓚同學。往見之。以爲平原相。旣而歸陶謙。操之攻謙也。先主將兵救之。及謙疾篤。迎之。謙卒。遂領徐州。袁術攻備爭徐州。備降於呂布。布以爲豫州刺史。董承受獻帝密詔。與備共誅曹操。而未敢動。會操遣備邀袁術。備殺徐州刺史車胄。行太守事。郡縣多叛操。屬備者衆數萬人。操擊破之。獲其妻子。備奔青州。歸袁紹。操復擊之於汝南。備奔荊州。依劉表數年。始得孔明。表卒。或勸備取荊州。備以表臨亡託孤。不忍取其子琮。遂舉州降操。備奔江陵。操追之。備奔夏口。追及當陽。備棄妻子。走孔明。請求救於孫權。乃與魯肅說權同力擊賊。遂有赤壁之捷。權以備領荊州牧。備在荊州。周瑜數勸權取益州。權遣使謂備。備曰。備與璋託爲宗室。冀憑英靈。以匡漢朝。願加寬貸。權不聽。遣瑜率水軍往夏口。備曰。汝欲取蜀。吾當被髮入山。不失信於天下。權不得已。召瑜還。及備攻劉璋。權曰。猾虜乃敢挾詐如此。備旣得益州。權使人求荊州。備不肯還。遂分之。

繇今觀之。荊州吳蜀之衝。曹操受劉琮之降。而不能有也。備僅得其半。非益州無可用武者。其取之蓋非得已也。統之言曰。事定之後。封以大國。何負於信。今日不取。終爲人利。操之視備。門上之莠也。操有益州。則備棲身無地。性命亦不可保。益州險遠。可卻敵兵。欲息民休士。三十年而後用之。孔明與先主籌之審矣。第取益州。當於周瑜未西之時。瑜還未幾。而自食其言。使權以爲口實。劉曄謂先主有度而遲。此其大者也。取宗室之孱子。所必不能有之地。以安其身。而爲匡復宗社之根本。豈非仁義之大者哉。

曹操

自古以來。亂臣賊子。時時有之。然未有如曹操之惡者也。操力如項羽。而姦謀遠過之。少而好爲游俠。實盜賊也。曾與袁紹劫人新婦。又夜入張讓之宅。讓手戟於庭。踰垣而出。值漢祚垂亡。獻帝孤弱。以破黃巾起。初猶奉天子以令諸侯。未幾自兗州牧。入爲丞相。領冀州牧。封魏公。已而進爵爲王。政繇已出。譬之優場。一人也。而忽焉吹簫。忽焉鳴玉。忽焉操箏。忽焉執珪。皆其所自爲也。非有命之者也。操死。丕立爲太子。遂迫獻帝篡位。而謂之禪。勸進辭讓。至於再三。史臣曰。此非獨欺人。蓋欺天也。是使曹操父子拊掌於地下者也。夫操何以欺人爲哉。畏人者乃欺人耳。彼恃其奸雄絕世。劉備袁紹孫權之倫。皆非其敵。獨一孔明可畏。而時勢不利。籌策難施。天下乃其囊括中物耳。獻帝尙在。而孫權已稱臣於操。倏然受之。建宗廟社稷。立太子。置百官。用天子車服。出入警蹕。而又殺母后。掘祖陵。勦皇子。戮忠良。豈欺人者耶。欺人。伯者

之事也。伯者之力足以威天下，而慮徒力不足以服天下，故假仁義以行之。天下皆知其假也，而力不能亢，皆吞聲以服之。齊桓公管仲是也。此其人亦姦人也。然其尊天子也，則天子誠尊矣。其攘夷狄也，則中國誠免於被髮左衽矣。故孔子稱其爲仁。逮於齊景公伐徐，徐子及郕子莒人會齊侯，盟於蒲隧，賂以甲父之鼎而還。叔孫昭子曰：「諸侯之無伯也害哉！以爲有伯者，則景公不敢如是之肆也。矧敢爲曹操哉！以其託名禪代也，而謂之欺人，然則必欲其明言爲篡，而後謂之不欺耶？夫仁義道德在君子視之，則性命也。在小人視人，則衣冠也。古讌享之禮，必有一人爲客，客者一坐所尊也。雖不肖之人，亦必正其衣冠，以據上坐。況篡天子之位，爲天下所尊者乎？安得不假諸仁義道德以爲一日之用也？曹丕僭位，五傳而爲司馬氏所篡，刺曹髦於闕下，而四方無問者，自此篡弑之賊皆稱禪代。曹操其作俑者也。嗟乎！天聽彌高，世趨日下，世人皆明明爲惡，侯王不復有伯者矣。士大夫不復有鄉愿矣。閭閻不復有游俠矣。道廢而俗頹，君危而民苦，殆不知其所底止也。」

孔明兄弟分仕三國

孔明之兄瑾仕於吳，從弟誕仕於魏，而孔明仕於蜀漢。瑾使蜀，惟與孔明公會，反無私面。論者謂孔明兄弟分仕三國，國人不以爲貳，比之伊尹往來夏殷，繇孔明躬耕如伊尹，素無富貴之念，足以取信於天下，以此稱孔明似也。不曰瑾與誕之在二國，亦不以爲貳乎？是三伊尹也。夫漢祚衰微，曹瞞擅世，此天地閉，

賢人隱之時也。不得已而仕，必能討賊扶漢而後可耳。孔明躬耕南陽，不求聞達，先主三顧於草廬之中，孔明以其漢室之胄，其人可與有爲也，而遂就之，所謂不得已而仕者也。曹操之惡無論已，彼孫權者，亦知扶漢之爲義，而非其本心，見曹操姦雄蓋世，又挾天子以令天下，保守江南之華樂，惟恐失之，故僞交先主，以道義士之非，而數敗其成，以免曹操之忌，竟稱臣於操，亦豈可就者哉？二子之仕，皆志在富貴，而不在於忠義故也。其所以不見疑者，譬如婦女所適非人，而能閉心自慎，以免黜辱，此馮道之流也。遂使兄弟之間，遠嫌防禍，居居吾吾，有如胡越。此孔明之至不幸也。當其時，以爲蜀得其龍，吳得其虎，魏得其狗，孔明則真龍也。二子者亦皆似之。夫龍者，食於清者也；虎者，食人者也；狗者，無所不食者也。

正統一統論

陳壽之志三國，帝魏而附蜀吳，後儒遵朱子綱目義例，以蜀漢接正統，而二國附焉。其非一統者，皆附於一統者之內。陳壽誠謬矣。後儒之云，殊亦不必然也。夫天下重器，非可夜半負之而趨也。其所以取之，昭昭在人耳目，不可掩也。篡奪者雖欲比於堯舜，稱亂者雖欲比於湯武，其孰信之哉？直書其事，邪正自見矣。烏在乎正與附也？夫一統者，未必爲正統也，必以一統者自爲紀乎？則蜀漢非一統也，而自爲紀者，以其爲正統也。必正統而後自爲紀乎？則晉之篡位，猶魏之篡漢也。晉何以自爲紀也？夫皆之賊也，豈其巢穴之廣狹，時日之久近，遂可據之以爲昂抑哉？夫篡位者，欺君孤弱，坐而奪其成業，大抵皆一統也。曹操

之遇先主。偶然耳。此亂臣賊子之便計也。而得混列於正統。其爲世道人心之害。去陳壽能幾何哉。

唐太宗

昔顏淵問仁。孔子告之以克己復禮爲仁。曰季曰古也有志。克己復禮仁也。信善哉。繇此言之。孔子之告顏淵。述古志也。至云一日克己復禮。天下歸仁焉。乃所以發明古志之言仁。如此其大也。繇此言之。克己復禮所以爲仁。仁者人也。非以務名而求勝也。務名而求勝。則於己必有不能盡克者。違於仁而愆於禮矣。唐太宗除隋之亂。致治之美。迄今稱之。獨其與兄建成弟元吉以爭儲位。而並殺之。乃納元吉妻楊氏而生子。明封曹王。以繼巢刺王之後。巢刺王者。元吉也。夫象日以殺舜爲事。舜爲天子。封之有庠。元吉之欲殺兄與象同。太宗亦殺建成矣。又殺元吉矣。何忍納其妃也。舜不可及矣。卽庸常之人。殺弟而取其妻。兄弟不必言矣。卽殺路人而取其妻。於心亦有所不忍。不知太宗何以能忍也。想其作如此事。亦必有徘徊顧慮而不敢爲者。而好色之心。必不能克。遂縱而任之。此時高祖尙在。不知何以上見。對羣臣萬姓。何以爲顏。旣而又欲立以爲后。以魏徵辰羸之喻而止。則其良心漸滅無餘矣。卽此一事。足以概太宗之爲人矣。隋之舊臣固難盡棄。至如裴矩者。撰西域圖記。使煬帝通西域。又說之封高麗。疲敝中國者也。封德彝者。諂附虞世基。隱匿盜賊。如趙高之欺二世者也。豈太宗未之聞耶。而猶用之。何也。得非其好佞之心。不能自克耶。大抵太宗聰明英毅。博學能文。無所不精。其過皆有心之過。知羣臣之必諫。設好言應之。以

取容諫之名而終有所不能改者。魏徵十漸不終之說猶未敢言其病根也。汲黯言漢武帝內多慾而外施仁義。太宗則內多慾而好言仁義者也。如苑中見蝗而吞之曰爲民受災。豈所以格天動物乎。從四夷君長之請而稱天可汗。欲以誇示夷狄。而於中國之體亦甚褻矣。自以爲兼行將相之事。臨朝言之而爲張行成所不取。羣臣言事者引古今以折之。而劉洎諫其損心損氣。自伐高麗。舉國遁去。驛書報太子曰。朕爲將何如。略舉其概。太宗者蓋不能克己而務名好勝者也。其好色之心必不能克。繇自負其有萬乘之才。足以致太平。身爲天子。稍爲淫樂無傷也。晚節聞故都督武士彠之女美。召入爲才人。後十三年而崩。高宗嗣立。高宗者名治。太宗以其孝。廢太子承乾而立爲太子者也。卽位未幾。遂以武才人爲昭儀。無何廢王后而立之。竟成則天皇帝。改元稱制。爲人中之妖孽。女中之桀紂。所殺唐子孫殆盡。自徐敬業謀匡復而不克。畏人不服。動以反逆誣人。誅殺不可勝數。淫亂暴虐。其以亡國有餘。狄仁傑辱身以存唐祚。此柳惠之所不能爲也。旣而明皇奪太子妃楊氏而后之。以致安祿山之亂。播越於蜀者三年而反國。其子肅宗復受制於張后。父子不相見。鬱鬱數年。相繼而崩。亂之降自婦人。何其慘也。嗟乎。人主何可以不克己也。一念之正。鬼神畏敬。一念之邪。其禍無涯。如唐之諸帝可鑒已。人主可不慎哉。創業之主尤不可不慎哉。

宋承東晉。民危俗敝之後。文帝恭儉寬仁。慎選守宰。以六朝爲斷。三十年間。四境宴安。百姓晨出暮歸。自事而已。士敦操尚。鄉恥輕薄。足以稱令主。垂裕後昆矣。而以江左偏安。必欲經略中原。於是王元謨袁淑之徒。爭獻策以迎合取寵。宋主曰。觀元謨所陳。令人有封狼居胥意。而淑之言曰。陛下今當席卷趙魏。檢玉岱宗。臣願上封禪書。沈慶之力諫不聽。遂遣元謨伐魏。取碭礪。進圍滑臺。此時魏主爲太武帝。英銳之主也。乃自將渡河。元謨聞鞞鼓之聲而遁。魏人追擊敗之。太武引兵長驅。席卷六州。所過赤地。斬截丁壯。嬰兒貫槊上盤舞。燕巢林木之上。元嘉之政衰矣。無幾而以姑息逆子。不免其身。此不自知而有雄心之患也。夫宋主固不知兵也。命將出師。每授以成律。與交戰之期。固非將在外君命有所不受之義。而檀道濟又以讒死。餘無能爲者。奈何橫挑勁敵哉。符堅之覆轍。在其前矣。符堅之治秦也。用王猛爲相。文武具足。秦國大治矣。而不欲其圖晉也。猛死而遂以晉爲事。符融深諫之而不聽。石越言晉有長江之險。堅曰。吾投鞭可斷其流。遂自將十萬兵。與謝元戰於淝水之上。大敗。中流矢而走。無何爲姚萇所害。夫人主之有雄心者。其擱然欲逞。視殺伐之捷。猶田獵之娛也。容悅之臣。知其無所還忌。以爲有功則受其慶。敗則無以罪之。皆唆佞以食。其意雖有忠言。必不入矣。一敗則其氣萎腰而不可復振。神情昏愁。舉動顛倒。鮮有不踣其國家。甚矣雄心之不可有也。志曰。能敬無災。老子曰。天將救之。以慈衛之。惟敬惟慈。可以長久。雄之一言。萬不可以爲訓也。劉劭之志人物。乃有英雄之目。詩書之所不載。帝王之所未有也。人主而喜。

爲英雄。則其臣必有以姦雄自喜者。此亂臣賊子之所以接迹於世也。可不戒哉。

